



Aqqalu C. Jerimiassen
Atassut

UPA 2022/110-1
11. Maj 2022

Inatsisartut aalajangiiffigisassaattut siunnersuut Naalakkersuisut peqquneqassasut piffissaq nunatta nunasiatut inissisimajunnaarfiani pisut qulaajarneqassasut, piffissaq pineqartoq Naalagaaffiit peqatigiit nunasiaataajunnaarsitsinissamik piumasaqaataat Danmarkimit malinneqarsimanersut misissuiffigineqassasoq. Qulaajaanissamut suliakkiissummik kikkunnillu suliarineqarnissaanik aalajangiiffigisassamik UKA 2022 Inatsisartunut saqqummiunneqassasoq, suliakkiissullu qinigaaffik naatinnagu aallartinneqassasoq. Inatsisartunut ilaasortaq Doris J. Jensen, Siumut

Nallinnartunnguatut immitsinnut isigiunnaartariaqarluinnarpugut. Aatsaami nammineq inuunitsinnut akisussaaffimmik tiguisinnaaleriarutta nammineernerulissaagut.

Saammaasseqatigiinnermut isumalioqatigiisitaq sulereernikuuvoq, piffissanngorpoq ingerlariaqqinnissatsinnut.

Akisussaaffik ilinniippoq, akisussaaffik uanniippoq. Ajornaqaarmi allanik pisuutitsiuartilluta nikikkunnanngilagut. Inuiaqatigiit nukittuutut immitsinnut suaarutigiuarriarutta takutittariaqarparput aporfissaasinnaasut unittoorfigiinnarnagit piiarsinnaagigut, periarfissallu suli atorluanggisagut ugartornerulerlugit.

Quianarsinnaagunaraluarpormi uagut Atassummiit unittoornikutut taaneqartartugut, illuatungaaniilli ukiorparujorujussuit matuma siorna pisut allaniit suli unittoorfigineqaqqallutik ingerlariaqqinneq ajulissutaammata, namminiilivinnissamillu oqaasiinnakkut nilliajuartuarniaatigalutik.

Nunasiaataasimanerummi kinguneri suli atorigut ersarippoq. Iliuuseqartoqarnissaanut utaqqiinnartunngorsimaneq, pisortanik isumalluuteqarpallaalersimaneq, nammineerluta inuunitsinni akisussaaffimmik tiguisinnaanerup eqqarsartaatsinni killeqarsimaarneq.

Inuusuttorsuusugut ingerlariaqqikkusuppugut, unittoorfigisagut qaangerlugit. Ajoraluartumimmi suli inoqarpoq isumaqartunik suli nunasiaataasugut. Taamaattumillu tamanna



paasissutissiissutigisariaqarparput. Qamuunami ilukkut sulii pitusimasutut misigineq inatsisitigut aaqqinneqarsinnaanngilaq.

Uteqqillarali, naalagaaffinngornissamut Atassummiit akerliunngilagut. Pivusorsioortumilli ajoraluartumik annernarsinnaagunaraluartoq oqartariaqarpugut massakkut piffissaanngitsoq. Piffissaavoq aqutseriasitta allanngortinnissaanut, innuttaasunik kiffaanngissusiliisumik, innuttaasut siuarsaaqataanerulernissaannik aqutissiulluta.

Naalagaaffinngornissaq inuit nammineertut, akisussaaffillit, allanik pisuutitsiniaaginnartuunngitsut pilersitassaraat.

Atassummiit inuit qitiutittuassavagut, qaqugumulluunniit. Nunami inoqanngippat pinngortitaannaavoq kusanartorsuaq.

Siunnersuuteqartup siunnersuutaa paasilluarparput, kalaalerpasuummi sulii pituttugaasutut killilersugaasutut, isiginnaartuuginnartutullu misigippat. Pingaarutilipilorujussuuvorlu tamanut paasitinnissaa, tamakku killilersuinertut misigilersitsisut tassaammata uagut nammineerluta maani inersuarmi inatsisiliagut. Oqartussaafferujorujussuaq nammineerluta Inatsisartutigut, ulluinnarnilu sumiiffikkaartuni kommunitisinniit aqunneqartut.

Oqartussaafferujussuarmi qitiusumut tunniunniukuarput. Pisortaniillu aqutsinerujussuaq imak annertugilersimavoq allaat kommunistitupajaaq aqutsineq kikkut tamarmik qulangerlugit ingerlatsilersimalluta. Taamatullu aqutsineq ingerlajuassappat innuttaasut sulii isiginnaaginnartutut misigiuassappat.

Immitsinnut nalligiunnaarluta, allanillu pisuutitsiunnaarluta akisussaaffik nammineerluta tigutigut. Oqaannarnata suaarutigiinnarnagulu namminiilivikkusulluta, oqartussaaffik inunnut tunniutigut, killilersuusiagut piiarlugit, kiffaanngissuseq annertusartigu, nammineq suliffeqarfinnik pilersitsisinnaanissaannut aporfiusut piiartigit, akileraartarneq apparterujussuartigu, inuup pisortaniit isumalluuteqarnera annikillisarlugu.

Piareersimavugut oqaloqatigerusuppassilu nunatsinni aqutsinikkut aaqqissusseqqitta, meeqqagut ilinniartitsigit imminnut napatissinnaanissaannik, oqaluttuarfigiinnarnagit inuiattut nukittuujugatta



namminiilivittariaqartugut. Oqaluttuutsigit inuk nammineertoq allanik isumalluuteqartuunngitsoq, inuk nammineertoq akisussaaffeqartoq, inullu nammineertoq pisortanik utaqqiinnartuunngitsoq.

Alloriarnerli siulleq uagutsinniippoq, aporfiiit piiartigit, inuiaqatigut tatiginerulertigit, qulaaniillu aqutsinerujussuaq appartillugu. Nammineersinnaaneq avataaniit qinnutigisassarinnngilarput, nammineerlutaana pilersitassarput. Isumarput dekoloniserertariaqarput.

Saperasi oqaannarasi, saperasi suaaginnarasi isumaqaleritsi.